

ներով: Այս թումբի միջին մասում պատի մեջ թողած պատրհանում հանգչում էն հորիզոնական դիրքով դեպի առաջ ձգվող երկու զուգահեռ և երկար (8—10 մ) ծանր գերանների գլխներ: Նրանց հակառակ ծայրերը պռկած են արջի վրա: Արջը լայն և կարճ, ամբողջական կամ երկու միացված կտորներից կազմված հաստ տախտակ է, որի կենտրոնում եղած ծակն ունի պտտակային հակառակ կտրվածք: Այս ծակի միջով անցնում է պողօսիկ՝ հաստ փայտե պտտտակը, որն իր երկաթապատ ոտքով ուղղաձիգ տնկված է հատակին նստեցրած քարե պատվանդանի մեջ և պտտվում է նրա փորվածքի մեջ: Պողօսիկի վրա, գետնից մարդու գոտկատեղին հավասար բարձրությամբ, հորիզոնական դիրքով աճացված է մեջտեղը անցք ունեցող կլոր քար⁹¹, որով պողօսիկը կարելի է պտտեցնել և այդպիսով բարձրացնել կամ իջեցնել նրա վրա հագցրած արջն և արջի հետ երկու գերանների ծայրերը:

Սարքավորումը գործում է այսպես՝ սրահի թամբի մեջ շինված է 1,6 մ երկարությամբ և 0,60 մ լայնությամբ և նույնչափ խորությամբ քարե արկղ: Այս օջախի՝ արկղի մեջ շար-շար դարսում են կտավհատի խմօրը՝ այծի մազից պատրաստված շալերի՝ բոխաճեղի մեջ փաթաթված՝ տակից նախօրոք փոխելով բարակ ճիպօտներ: Խմօրը վերևից ծածկում են ավելի հաստ ձողերով և տախտակներով, որոնք բռնում են օջախի ամբողջ ներսի տարածությունը՝ ափից ափ: Վրայից դնում են հաստ լաշ՝ կոճղ: Մինչ այդ բարձր պահած գերանները սկսում են իջեցնել՝ պողօսիկն անիվի օգնությամբ պտտեցնելով և այդպիսով արջը իջեցնելով: Գերաններն իրենց ծանրությամբ ճնշում են լաշը, որի տակ խմօրը սեղմվում է և քամվում: Ձեթը նախ անցնում է փոքրիկ ավազան և ապա այնտեղից թափվում է ավելի խորը նստեցրած կարասի մեջ:

Վարձը վճարվում էր քամած ձեթի մի մասով⁹², առանց բաժին հանելու բուսպից: Աշխատանքի միջոցին բոլոր բանվորները կերակրվում էին կտավհատի տիրոջ հաշվին:

Օ Ղ Ի Ք Ա Շ Ե Լ Ը

Թթենու բուծումը Ձանգեզուրում ունի մի այլ նպատակ ևս, այն է՝ նրա պտուղից արաղ՝ օղի են քաշում: Օղին զանգեզուրցու կենցաղի մեջ մտած պահանջ էր: Մի թաս օղիով նա սկսում էր իր օրը, աղոթք անելով և օրվա հաջողությունը աստծուց հայցելով: Հյուրի ներս մտնելուն պես նա հրամցնում էր օղին մազայով:

Տղատիրոջ տանից աղջկա տիրոջ տունը մինչև հարսանիք մի քանի անգամ այս կամ այն օրվա առիթով շշուկ կամ փոքրիկ կուլիկավ նվեր էր ուղարկվում օղին: Հարսանիքի ժամանակ հյուրերի շարքերը պտտում էր օղու գավաթը: Օղիով խմվում էր հանգուցյալի հիշատակը և բարեմաղթվում, որ հանդերձյալ կյանքում նրա հոգին լուսավորվի: Օղու այսպիսի դեպքերում անհրաժեշտորեն գործածվելն անշուշտ վերապրել է շատ նախնական ծիսակատարություններ՝ օղին այստեղ փոխարինել է հին նվիրական խմիչքին:

⁹¹ Գետաշենում՝ կախար:

⁹² Գետաշենում 1/8-ը: